

Naalakkersuisut peqquneqassasut aalisarnermik piniarnermillu inuussutissarsiutillit inuussutissarsiornerannik siuarsaaneq pillugu Inatsisartut inatsisaannik allannguutissatut siunnersuuteqaqqullugit, taamaalioreerpata inuussutissarsiutigalugu aalisartut piniartullu siunissami inuussutissarsiornerannik siuarsaanermut atatillugu inuussutissarsiummik umiatsiaarartaarnissaannut attartortissinnaalernissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq Jens NapâtôK', Naleraq)

Akissuteqaat

(Aalisarnermut, Piniarnermut, Nunalerinermut Imminullu Pilersornermut Naalakkersuisoq)

Siullermeerneqarnera

Inatsisartunut ilaasortaq, Jens NapâtôK, Naleraq, aalajangiiffigisassatut siunnersuuteqarmat Naalakkersuisut qutsavigaat, tassani Naalakkersuisut peqquneqassasut aalisarnermik piniarnermillu inuussutissarsiutillit inuussutissarsiornerannik siuarsaaneq pillugu Inatsisartut inatsisaannik allannguutissatut siunnersuuteqaqqullugit, taamaalioreerpata inuussutissarsiutigalugu aalisartut piniartullu siunissami inuussutissarsiornerannik siuarsaanermut atatillugu inuussutissarsiummik umiatsiaarartaarnissaannut attartortissinnaalerlugit.

Siullermik erseqqissaatigissavara inuussutissarsiutinik siuarsaaneq pillugu Inatsisartut inatsisaat sulii atuummat, taamaammallu inuussutissarsiutinik siursaaniarluni sulii attartortoqarsinnaalluni. Taamaattoq aningaasanut inatsimmi konto 51.07.42 taarsigassarsiaritat erniallit 2020/2021-mi COVID pillugu misissuinermut atatillugu aningaasaliissutit sipaarutaasimapput. Tamatuma kingorna konto-mi pingaarnermi aningaasaliisoqarsimanngilaq.

Tamatuma saniatigut inuussutissarsiummik umiatsiaarartaarnissamut tapiiffigineqarnissamut konto pingaarneq 51.07.40 atorlugu periarfissaqarpoq, tassani inuussutissarsiutigalugu umiatsiaaqqap pissarsiarinerani akiata 75 %-imiit 84 % tikillugu tapiiffigineqarsinnaanermut periarfissaqarluni. Taamatuttaaq konto pingaarneq 50.06.50 atorlugu peeriarfissaqarpoq nutaamik atornikumilluunniit angallatitaarnermi pissarsiarinerata akiata 40 % tikillugu tapiissutisisoqarsinnaalluni.

Ingerlatsivimmit ilisimaneqarpoq attartorluni akilersorneqartussanit tapiissutit soqutigineqarnerusut.

Maluginiaqquneqarpoq sinerissap qanittuani aalisartut tunisaat, tassa sinerissap qanittuani aalisartunut akiliutit tamarmiusut, qaffakkiartorsimanerat. Taamaallutik sinerissap qanittuani aalisartunut akiliutit katillugit 332 mio. kr.-inik imaluunniit 39%-inik ukiuni qulini kingullerni akiliutit qaffariarsimapput, 2015-imi 842 mio. kr.-init 2024-mi 1.174 mio. kr.-inut. Qaffariaat tunisat amerlinerannut kiisalu tunisinermi akinik qaffaanernut tunngaveqarput. Qaffariaatinut taakkununga bonusitut tunniunneqartartut, assartuinermut tapiissutit il.il. ilanngunneqanngillat.

Aamma aalisarnek pillugu inatsimmi nutaami Pisassiissutit Niuerutigineqarsinnaasut Nammineq Pigisat pillugit aaqqissuussineq PNNP atuutsilersinneqarpoq, tassa PNNP saattuarniarnermi kiisalu aqutsiveqarfimmi 47-mi umiatsiaararsortunut, piumasunut

atuutilersinneqarmat. PNNP-mut ikaarsaariarnermi aalisartut pisassiissutinit tamarmiusunit nammineq pigisaqalerput taakkulu aalisarnerminnik inerisaanerminnut atatillugu qularnaveeqqutitut atorsinnaavaat.

Tunngaviusoq alla tassaasinnaavoq aalisartut aningaaserivimmut ingerlatseqatigiiffinnulluunniit aamma attartortarnerat. Naalakkersuisut aalisarneq pillugu inatsisip nutaap akuerineqarneranut atatillugu aningaaseriviit oqaloqatigaat, aningaaseriviillu aalisarnermut sulit soqutiginnillutik oqaatigaat – aamma sinerissap qanittuani aalisarnermut. Aningaaserivimmit attartortoqassappat ataasiakkaat akiliisinnaassusaannik naliliinermik piumasaqaateqartarpoq.

Tamanna tunuliaqutaralugu Naalakkersuisut inuussutissarsiutinik siuarsaarnermut attartugassanik sinerissap qanittuani atorneqartussanik immikkoortitsinissaq pisariaqarsorinngilaat. Aalisartut akilersinnaalluarmut ingerlatsisut imaluunniit PNNP malillugu aalisartut angallatiminnik nutarsaaniarlutik atortussarsiniarlutillu inerisaanissaminnut attartorsinnaareerput.

Taamaattoq sulit aalisartoqarpoq piniartoqarlunilu pisariaqartitaminnik attartornissamut periarfissaqanngitsunik. Taakkununga tunngatillugu Naalakkersuisut isumaqarput tapiissutit attartugassanut utertillugit akilerneqartussanut taarsiullugit pitsaanerusut. Aamma tapiissutit attartortitsinermut sanilliullugit allaffissorinannginnerupput. Tapiissuteqartarnerit inuussutissarsiutinik siuarsaaniarluni attartortitsisarnernut paarlaallugit inerisaanikkut allaffissornermi isumalluutit maannakkutut inissisimatinneqarsinnaapput. Taamaaliornermilu aningaasaliissutit ullumikkut tapiissuteqarfiusunut agguanneqartartut atuutsilernissaat ukkatarineqarsinnaapput, taamaaliornermi inuussutissarsiteqartut piumasaat naammassiniarneqarsinnaallutik, attartortitsinissamut aningaasaliissutissanik nutaanik ujarlerneq piunnaarlugu. Taamaaliornikkut isumalluutit aalisartunut piniartunullu iluaqutaanerpaallutik atorneqassapput.

Naalakkersuisut anguniarpaat ESU pillugu inatsisinik nutarsaaneq tunngaviussasoq, taamaalilluni inatsiseqartitsineq tapiissutinik tunniussisarneq ullumikkut siunissamilu sinerissap qanittuani aalisartut pisariaqartitaannut naleqquttuuniassammat. Inatsisip suliarineqarnerani inuussutissarsiteqartut qanimut oqaloqatiginissaat pingaaruteqarpoq. Suliaq taanna pilersaarusiorneqalerpoq nutaamillu inatsimmik siunnersuuteqartoqarnissaa Upernaakkut ataatsimiinnermi 2027-mi pinissaa Naalakkersuisunit naatsorsuutigineqarpoq.

Ilanngullugu ilisimatitsissutigisinnaavara Aalisarnermut Siunnersuisoqatigiit sinerissap qanittuani aalisariutinut 6 meterinit takinerusunut tunngatillugu unammilligassanik taakkuninngalu aningaasalersueriaatsinik misissuisussamik suleqatigiissitamik suligasuarmut pilersitsinikummata. Aningaasalersueriaatsit pillugit unammilligassat aningaaseriviit suleqatigalugit suliarineqarput. Suleqatigiissitap Aalisarnermut Siunnersuisoqatigiinnut inassuteqaatissani 16. december saqqummiutissavai. Inassutit Aalisarnermut Siunnersuisoqatigiinni suliarineqareerpata ESU-mut inatsip aqqissuuteqqinneranut suliamut ilaatillugit suliarineqarsinnaassapput.

Taarsiullugu Naalakkersuisut isumaqarput, inuussutissarsiortut qanimut oqaloqatigalugit ESU-mit tapiissutit nutarsarnissaat qitiutinneqassasoq. Tamanna aalisarnerup aamma aalisartut piniartullu qinnuteqarnissamut pitsaanerusumik periarfissaqanngitsut siunissaannik qulakkeerinnissaaq.

Tamakku tunngavigalugit Naalakkersuisut innersuussutigaat aalajangiinissamut siunnersuut itigartinneqassasoq.

Taamatut oqaaseqarlunga oqaluuserisassaq Inatsisartunut oqaluuserisassanngortippara.